

INUIT ATAQATIGIIT

INATSISARTUNI



8. august 2011

UKA 2011/52

Matumuuna Inatsisartut suleriaasiat § 33 naapertorlugu Inatsisartut ataatsimiinnissaanut aalajangigassatut siunnersuuteqarpunga:

Meeqqat ulloq unnuarlu angerlarsimaffiit inissinneqarsimasut qanoq akulikitsigisumik kommunit Naalakkersuisullu inissiissuussimanertik tunngavigalugu nakkutiiliartorlutik misissuisarnissarnissamik pisussaaffeqarnissaanik Naalakkersuisut sulissuteqaqqullugit peqquneqarnissaanik Inatsisartut aalajangiiffigisassaattut siunnersuut.

(Inatsisartunut ilaasortaq Jane Petersen, Inuit Ataqatigiit)

Tunngavilersuut:

Naalakkersuisut pisussaaffeqarput meeqqat angerlarsimaffiit avataanut ulloq unnuarlu angerlarsimaffiit inissinneqarsimasunik nakkutiiliinissamut. Tamanna meeqqat inuusuttuaqqallu ikiorserneqartarnissaat pillugu Inatsisartut peqqussutaani § 23, imm. 2 tunngavigalugu pisussaaffiliineruvoq.

Aamma pisussaaffiliineq Namminersornerullutik Oqartussat isumaginninnikkut pisussaaffiit nakkutiginnissaat pillugu kaajallaasitaata § 6-mi allaqqasuni naqissuserneqarsimavoq.

Kommunit meeqqanik ulloq unnuarlu angerlarsimaffinnut inissiinissamik aalajangiussaarsimasut pisussaapput meeqqamik nakkutiiliinissamik, ilanngullugu nakkutigisussaallugu ilumut angerlarsimaffiup avataani inissiisimanermut tunngatillugu siumut pilersaaruserneqarsimasoq malinneqarnersoq. Taamatut meeqqat angerlarsimaffiup avataani inissinneqarsimasut nakkutigineqarnissaat pillugu pisussaaffiliisimaneq, meeqqat inuusuttuaqqallu ikiorserneqarnissaat pillugu inatsisartut peqqussutaani § 4-mi naqissuserneqarsimavoq.

Naalakkersuisut kommunillu nakkutiiliinissamik pisussaaffilerneqarsimanertik tunngavigalugu qulakkeerniartussaavaat, meeraq meeqqat ulloq unnuarlu angerlarsimaffimmut inissinneqarsimasoq, toqqissisimalluni tassaniissinnaanissaa.

Taamakkaluartorli – maleruagassat misissuiffiginerani takusinnaasimangilara – qanoq akulikitsigisumik Naalakkersuisut kommunillu meeqqat ulloq unnuarlu angerlarsimaffiini nakkutiiliisarnissamik pisussaaffilerneqarsimanersut.

Massakkorpiaq nunatsinni meeqqat ulloq unnuarlu angerlarsimaffiit Namminersorlutik Oqartussanit akuerineqarsimasunik 24-nik ingerlatsisoqarpoq. 2010-mi meeqqat 0-miit 17-t tikillugit ukiullit 7%-iisa missaat angerlarsimaffiup avataani inissinneqarsimapput. Taakkunannga sisamararterutai pallillugit, meeqqat ulloq unnuarlu angerlarsimaffiini inissinneqarsimallutik.

Deloitte-p februar 2011-mi ulloq unnuarlu angerlarsimaffii pillugit nalunaarusiornermini maluginiarsimavaa, angerlarsimaffinnut pineqartunut aalajangersimasumik akuttussulikkanik nakkutilliiartortoqartarsimanngitsoq.

Ulloq unnuarlu angerlarsimaffiit pillugit Deloitte-p nalunaarusiamini aammattaaq tikkuarsimavaa, taakkunani sulisuusut pisortasullu annertuumik tunniusimallutik meeqqat inuusuttuaqqallu peroriartornermini inuttut ajornartorsiuteqartut aammalu meeqqat inersimasullu annertuumik innarluuteqartut paaqutaralugillu sulissutarisaraat.

Taamaakkaluartoq meeqqat angerlarsimaffiit avataani ulloq unnuarlu angerlarsimaffinnut inissinneqarsimasut pillugit nakkutilliinissamik pisussaaffeqarnerput mikinerulinngilaq, tassami taamaasiornikkut meeqqat toqqissillutik peroriartornissaat qulakkeerniartussaagatsigu. Meeqqat inuusuttuaqqallu ikiorserneqartarnissaat pillugu Inatsisartut peqqussutaata, ilaatigullu FN-p meeqqat pisinnaatitaaffii pillugit aalajangersagaannit toqqammaveqartut tamaasiortarnissamik pisussaaffilerpaatigut.

Inatsisartut 2010-mi ukiaanerani ataatsimiinnermini Naalakkersuisut pisussaaffilerpaat, meeqqat inuusuttuaqqallu angerlarsimaffiit avataannut inissinneqarsimasut pillugit qanoq ulluinnarni atugaqarnersut pillugit nakkutilliisarnissaanik. Tamatumunnga tapitartuullugu pissusissamisoorara, Naalakkersuisut peqquneqassasut, qanoq akulikitsigisumik Naalakkersuisut kommunillu nakkutilliiartorlutik pulaartarnissaaanik maleruagassanik sanaqquneqassassappata.

Aningaasatigut allaffissornikkullu pisortanik pisussaaffiliinerup naleqassangatinneqarnera.

Maleruagassap nutaap suliarineqarnissaanut tunngatillugu naatsorsuutigineqartariaqarpoq ukioq affaa inorlugu sulinerup nalinganik (årsværk), suliniuteqarnek kinguneqarumaartoq.

Siunnersuutit toqqammavilersorneratigut Naalakkersuisut nammineerlutik aalajangertussaammassuk qanoq akulikitsigisumik kommunit Namminersorlutillu Oqartussat nakkutilliiartortarnissamik pisussaaffilerneqassanersut, siunnersuut toqqaannartumik pisortat aningaasartuuteqarnerulernerannik kinguneqartitsinaviannngilaq.

Taamaakkaluartoq siunnersuut akuerineqassaguni inatsisitigut pisussaaffiliineq tunngavigalugu naatsorsuutigineqartariaqassammat piffissani aalajangersimasuni akuttussuseqartuni nakkutilliiartorluni pulaartoqartassasoq, naatsorsuutigineqartariaqassooq kommunit Naalakkersuisullu tamatumunnga aningaasartuutigisartagaat qaffaallakkumaartut. Aningaasartuutit qanoq annertutigiumaarnissaat, minnerpaaffissanik pisussaaffiliinermi qanoq aalajangiisoqarumaarnersoq apeqqutaatillugu tamanna annertussuseqarumaarpoq.

Naalakkersuisut meeqqat ulloq unnuarlu angerlarsimaffiitut nakkutilliisarnissamik pisussaaffilerneqarsimanerannut tunngatillugu erseqqissaatigineqassaaq, aningaasanut inatsimmi konto pingarneq 30.01.01, *Isumaginninnermut Pisortaqarfik, allaffissornek*, ukioq mannamut kr. 2.470.000-nik qaffaallatsinneqarsimammat, taavalu ukiuni missingersuusiorfusimasuni ukiut tamaasa kr. 1.970.000-nik annertusiallatsinneqartarnissaa siunniunneqarsimammat. Taamaasiornikkut siunertarineqarpoq ulloq unnuarlu meeqqat angerlarsimaffiit nakkutilliisarnersup pitsaanerulersinneqarnissaa.

Taamaattumik oqartoqarsinnaavoq, aningaasaliissutissatigut tamakkiisumik ilaannakortumilluunniit qulakkeerniarneqareersimasoq siunnersuutip piviusunnorgortinnissaanut atatillugu Isumaginninnermut Pisortaqarfimmit aningaasartuutit qaffassuteqarnissaat.